

Tɔnɔ kɔlɔ
ZAN
na pɔpɔni o ki bitɔ tin
Tɔnɔ kɔlɔ Zan na pɔpɔni o
ki bitɔ tin na bri dɔbam kɔlɔ
tin mu tuntu

Zezi kɔgɔ kum nakwi Zan daa ta mu pɔpɔni tɔnɔ kuntu o pa nɔɔnɔ wɔdonɔ o yiri mu Gayusi.

O pɔpɔni o tee Gayusi di o na togi We ciga kam yi o zɛni We nɔɔna badonnɛ te tin nɔwaaɛ mu.

Zan ma daari o ta nɔɔnɔ wɔdonɔ taani o yiri mu Diyotrefi o wi, o wɔ ki lanyirani di o na wɔ jɔŋi wɔm taani yi o wɔ jeeri We nɔɔna bam lanyirani tin.

O daa ta ma daari o tee nɔɔnɔ wɔdonɔ o yiri na yi Demetrisi, wuntu yi nɔn-nɔm mu nɔɔna maama yigɛ ni.

Tɔnɔ kuntu bri dɔbam si di yi lwani nɔn-balwaarɔ kikiɛ, si di taá ki lanyirani di togi We ciga kam di sono, di di na wɔ jeeri di ko-biɛ lanyirani te tin.

¹ Amu wɔlɔ na yi Zezi kɔgɔ kum nakwi tin mu pɔpɔni tɔnɔ kuntu a pa a cilon-sono Gayusi. Amu soe nmu ciga ciga.

² A cilon-sono, We wɔ ki-m lanyirani wonɔ maama wɔni. A loori We mu a pa nmu, si n yira taa jigi yazurɛ, ni n bicari na togi We cwɛnɛ kam lanyirani te tin.

³ Dí ko-biə badaara tu ba ta nmu taani, yi ku pa a tiini a na wupolo di a na lwaru ni n togi ciga cwəŋə kam lanyirani tun. A nan ye ni n sɔni n togi ciga kam kuntu mu.

⁴ Kulukulu tərə ku na wó wani ku pa a ja wupolo ku dwəni a na lwaru ni a biə bam sɔni ba togi ciga cwəŋə kam tun.

⁵ A cilon-sono, nmu ki lanyirani di n na yəni n zəni dí ko-biə bam te tun, di ku na manɔ ku yi vərə di.

⁶ Dí ko-biə bam tagi Zezi kogo kum yigə ni nmu na ki-ba lanyirani te tun. Ku lana si n ta n wəli-ba ba cwəŋə kam vəŋə wɔni, si ku manɔ di Wɛ wɔbɔŋa na lagi te tun.

⁷ Bɛɲwaani nɔɔna bam kuntu nunɔ si ba toli Zezi Krisi kwər-ywəŋə kam mu. Ba nan ba jɔŋi kulukulu balu na ba togi Zezi ciga kam tun jɔŋa ni.

⁸ Kuntu ɲwaani ku manɔ si dɔbam mu zəni nɔɔna bam kuntu dwi si ba wani ba tɔŋi, si ku bri ni dɔbam di togi dí tɔŋi Wɛ ciga kam ɲwaani.

⁹ Amu deen pɔpɔni tɔnɔ a pa abam Zezi kogo kum. Diyotrefi wulu nan na lagi si o taa yi á yigə tu tun ba lagi si o jɔŋi kulɔ dɔbam na te tun.

¹⁰ Kuntu ɲwaani, a na tu abam te, aá ta wɔ-balwaarɔ tɔlu maama o na ki tun á maama yigə ni jaja. Wuntu yəni o ɲɔɔni ta-balwaarɔ mu o pai dɔbam. Kuntu nan ta ba poli o wɔ. Kulɔ na wəli da tun, o yəni o ba se si o jeeri dí ko-biə bam lanyirani, yi o daari o cəŋi balu na lagi si ba jeeri-ba lanyirani tun di, yi o ta zəli-ba Zezi kogo kum wɔni.

¹¹ A cilon-sono, yi se n lwani non-balwaarɔ kikiə, nmɔ za n kwaani n ta n ki lanyirani. Wɔlɔ maama na ki lanyirani tin yi We nɔɔnɔ mɔ. Wɔlɔ nan na ki kəm-balwaarɔ tin ta wɔ lwarɔ We.

¹² Kɔ nan na yi Demetrisi, nɔɔna maama te o na yi non-ɲɔm te tin, yi o na tɔgi ciga kam te tin di bri ni o yi non-ɲɔm mɔ. Dɔbam di nan bri ni kɔ yi ciga mɔ, yi abam ye ni di na te kulɔ tin sɔni kɔ yi ciga mɔ.

¹³ A ya jigi wəənu zanzan si a ta a bri abam. A nan ba lagi si a pɔpɔni a ki tɔnɔ ni.

¹⁴ A nan bɔɲi si aá ba abam te lele, si di laan ɲɔɔni daani jaja.

¹⁵ We wó pa-m yazurə.

Nmɔ cilonnə balɔ na wɔ yo seeni tin maama jɔɔni nmɔ. N di jɔɔni di cilonnə bam didɔa didɔa ba na wɔ nmɔ tee ni tin n pa dɔbam.

Wε Tɔno dɪ kasum

Kasem (Kassem): Wε Tɔno dɪ kasum New Testament

copyright © 1997 Wycliffe Bible Translators, Inc.

Language: (Kasem)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 18 Apr 2025 from source files dated 29 Jan 2022

993cfae5-b100-5981-87e7-5a648d773cb9